

CUSSEGL GROND

Sessiun da favrer 2023

Dumonda Krättli concernent il daner contant sco med da pajament primar en il chantun Grischun

Lescha federala davart l'unitad monetara ed ils meds da pajament (LUMMP: CS 941.10) prescriba en l'art. 3 al. 2 cler e net: «Mintga persuna sto acceptar las bancnotas svizras sco pajament, e quai senza limita da la summa.» Il daner contant è anc adina il med da pajament primar, er sche blers consuments prefereschan entant – per motivs da bonitad u pratics – da far transacziuns senza daner contant.

La pandemia da corona e la cumadaivladad han accelerà las midadas d'utilisar ils meds da pajament ed en tscherts secturs èsi in'alternativa pratica da pajar senza daner contant. Deplorablament datti dentant adina dapli rapports che persunas privatas na possian bleras giadas betg pli pajar servetschs en contant. Uschia pon ins per exempel observar sco las bancas allontaneschan adina pli savens singuls bancomats e renoveschan ils spurteglis ad in servetsch senza daner contant, ubain sco firmas – per il solit grondas u internaziunalas – en il chantun n'acceptan betg pli pajaments en contant.

Ils pli blers manaschis commercialis reglan cun lur clientela ina gronda part da lur transacziuns en contant. Er noss conburgais pli vegls vulan u pon bleras giadas betg pajar senza daner contant, e quest basegn duess vegnir respectà. Il pajar cumadaivlamain senza daner contant cumpiglia ultra da quai differentas ristgas, per exempel sche la crisa d'energia actuala chaschuna ina interrupziun dal current electric, sche l'internet è ord funcziun, sche l'apparat da leger las cartas na funcziuna betg correctamain, sche l'accu dal telefonin è vid u sche la colliaziun è schletta. Il mender è dentant ch'i vegnan incassadas taxas per mintga transacziun digitala. Questas taxas paja mintga singul utilisader. Quai signifitga ina restricziun massiva da nossa libertad e da nossa sfera privata.

Gugent supplitgesch jau la Regenza da responder a las sutsegnadras ed als sutsegnaders las suandantas dumondas:

1. En Svizra ed en il chantun Grischun ha il daner contant ina gronda impurtanza, cumpareglià internaziunalmain. Tge fa la Regenza, per che quai restia uschia e per ch'i na vegnia betg restrenschi u refusà a persunas da pajar en contant?
2. Tge fa la Regenza, per che la Banca Chantunala Grischuna na reduceschia betg ulteriuramain las prestaziuns, e per ch'i saja pussaivel da far pajaments e retratgas en daner contant als spurteglis da tut las filialas?
3. Tge fa la Regenza, sch'i vegn cuntrafatg a l'art. 3 al. 2 da la LUMMP e sche bancnotas svizras na vegnan betg acceptadas per pajaments senza limita da la summa?

Cuira, ils 15 da favrer 2023

Krättli, Metzger, Gort, Adank, Bachmann, Brandenburger, Bundi, Butzerin, Candrian, Casutt, Cortesi, Della Cà, Dürler, Favre Accola, Furger, Grass, Hartmann, Heim, Kasper, Menghini-Inauen, Morf, Rauch, Roffler, Schutz, Sgier, Städler, Weber